

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԲԱՐՁՐԱԳՈՒՅՆ ՈՐԱԿԱՎՈՐՄԱՆ ՀԱՆՁՆԱԺՈՂՈՎԻ
ՀՐԱՄԱՆ**

27 հունիսի 2000 թվականի թիվ 82

**«ԱՏԵՆԱԽՈՍՈՒԹՅԱՆ ՊԱՇՏՊԱՆՈՒԹՅԱՆ ՀԱՄԱՐ ԱՆՀՐԱԺԵՇՏ ՈՐԱԿԱՎՈՐՄԱՆ
ՔՆՆՈՒԹՅՈՒՆՆԵՐԻ ՀԱՆՁՆՄԱՆ ԿԱՐԳԻ» ՄԱՍԻՆ**

Հաստատել «Ատենախոսության պաշտպանության համար անհրաժեշտ որակավորման
քննությունների հանձնման կարգը»:

**ԱՏԵՆԱԽՈՍՈՒԹՅԱՆ ՊԱՇՏՊԱՆՈՒԹՅԱՆ ՀԱՄԱՐ ԱՆՀՐԱԺԵՇՏ ՈՐԱԿԱՎՈՐՄԱՆ
ՔՆՆՈՒԹՅՈՒՆՆԵՐԻ ՀԱՆՁՆՄԱՆ ԿԱՐԳԸ**

Սույն կարգը սահմանվում է ՀՀ վարչապետի 1996 թվականի հուլիսի 12-ի հ. 410 որոշմամբ
հաստատված «Հայաստանի Հանրապետության բարձրագույն որակավորման հանձնաժողովի
կանոնադրության» 3 ե) կետի համաձայն

1. Որակավորման քննությունները գիտական աստիճանաշնորհման անբաժանելի մասն են, որոնց
նպատակը հայցորդի՝ որպես ապագա գիտնականի մասնագիտական պատրաստվածության
ստուգումն է:

Սահմանվում են որակավորման քննություններ մասնագիտությունից, փիլիսոփայությունից եւ
օտար լեզվից, ինչպես նաեւ ստուգաքի՝ ինֆորմատիկայից:

Որակավորման քննություններ հանձնում են այն անձինք, ովքեր ունեն բարձրագույն կրթության
որակավորման հետեւյալ աստիճանները՝ դիպլոմավորված մասնագետ եւ մագիստրոս:

Քննությունը մասնագիտությունից հանձնվում է ատենախոսության թեմայի հաստատումից հետո:

2. Մասնագիտությունից քննությունը հանձնվում է այն գիտական հիմնարկներում,
կազմակերպություններում եւ բուհերում (այսուհետեւ՝ հիմնարկներ), որոնք ունեն ԲՈՀ-ի
թույլտվությունը:

Հիմնարկը ԲՈՀ է ներկայացնում մասնագիտական քննություն ընդունող հանձնաժողովի կազմը՝
հաստատման համար:

Հանձնաժողովը հաստատվում է հետեւյալ կազմով՝ նախագահ (գիտության դոկտոր) եւ 2-4
անդամներ (գիտության դոկտոր եւ թեկնածու): Մեկ անձը կարող է լինել երկուսից ոչ ավել
հանձնաժողովների անդամ: Հանձնաժողովում կարող են ընդգրկվել գիտնականներ նաեւ այլ
հիմնարկներից:

Քննությունը հանձնվում է այն մասնագիտությունից, որով հաստատվել է ատենախոսության
թեման՝ ԲՈՀ-ի հաստատած ծրագրով:

Անհրաժեշտության դեպքում կազմվում է լրացուցիչ ծրագիր, որը պետք է ընդգրկի հայցորդի
հետազոտությունների ոլորտը կամ գիտության տվյալ բնագավառի ընդհանուր մասնագիտական
հարցեր: Լրացուցիչ ծրագիրը մշակվում է համապատասխան ամբիոնում (բաժնում,
լաբորատորիայում) եւ հաստատվում է այն ԲՈՀ-ի (ֆակուլտետի), հիմնարկի գիտական
խորհրդում, որտեղ ընդունվում է քննությունը:

Այն դեպքերում, երբ հայցորդի բարձրագույն կրթությունը չի համապատասխանում գիտության այն
բնագավառին (ենթաբնագավառին), որով հաստատվել է ատենախոսության թեման, հայցորդը
պետք է հանձնի քննություն ընդհանուր մասնագիտությունից:

3. Քննությունները փիլիսոփայությունից եւ օտար լեզվից, ինչպէս նաեւ ստուգարքը ինֆորմատիկայից հանձնվում են այն գիտական հիմնարկներում, որոնք ունեն ԲՈՀ-ի թույլտվությունը:

Հիմնարկը ԲՈՀ է ներկայացնում քննություն ընդունող հանձնաժողովի կազմը՝ հաստատման համար:

Հանձնաժողովները հաստատվում են հետեւյալ կազմով՝ նախագահ (գիտության դոկտոր կամ թեկնածու) եւ 2-4 անդամներ:

Քննությունները եւ ստուգարքը հանձնվում են ԲՈՀ-ի հաստատած ծրագրերով:

4. Որակավորման քննությունները եւ ստուգարքը կազմակերպվում են տարեկան երկու քննաշրջաններով (մայիս-հունիս եւ հոկտեմբեր-նոյեմբեր ամիսներին):

Քննության եւ ստուգարքի ընթացքում յուրաքանչյուր հայցորդի համար լրացվում է

արձանագրություն, որտեղ գրանցվում են քննական հարցերը եւ քննության վերջնական արդյունքը:

Որակավորման քննությունները գնահատվում են 4 բալային համակարգով՝ «գերազանց», «լավ»,

«բավարար» եւ «անբավարար»: Մասնագիտական քննությունը համարվում է հանձնված՝

«գերազանց» կամ «լավ» գնահատականի դեպքում:

Արձանագրությունը ստորագրում են քննական հանձնաժողովի նախագահը եւ անդամները:

Արձանագրությունները պահպանվում են քննություն եւ ստուգարք ընդունող հիմնարկներում:

Որակավորման քննության եւ ստուգարքի հանձնման մասին տեղեկանքը տալիս է քննություն,

ստուգարք ընդունող հիմնարկը:

5. Որակավորման քննությունը կամ ստուգարքը չհանձնելու դեպքում հայցորդը կարող է այն

հանձնել հաջորդ քննաշրջաններում:

ԳՐԱՆՑՎԱԾ Է
ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ԱՐԴԱՐԱԴԱՏՈՒԹՅԱՆ ՆԱԽԱՐԱՐՈՒԹՅԱՆ ԿՈՂՄԻՑ
«18» 07 2000 Թ.
ՊԵՏԱԿԱՆ ԳՐԱՆՑՄԱՆ ԹԻՎ 30300065